



## SHHTNING OSTONA SAMMITI OLDIDAN SAMARALI MULOQOTLAR

O'zbekiston Respublikasi Prezidenti Shavkat Mirziyoyev 3-iyul kuni Shanxay hamkorlik tashkiloti Davlat rahbarlari kengashining navbatdagi majlisi va "ShHT plyus" formatidagi uchrashuvda ishtirok etish uchun Ostona shahriga keldi.



Ostona xalqaro aeroportida oliy martabali mehmonni Qozog'iston Respublikasi Bosh vaziri Oljas Bektenov va boshqa rasmiy shaxslar kutib oldi.

Shu kuni Ostona shahrida tashrif doirasida O'zbekiston Respublikasi Prezidenti Shavkat Mirziyoyev va Xitoy Xalq Respublikasi Raisi Si Zinpingning muzokaralari bo'lib o'tdi.

Uchrashuv avvalida davlatimiz rahbari Xitoy Raisiga O'zbekistondagi ortga qaytmas islohotlarni qat'iy qo'llab-quvvatlayotgani hamda mamlakatlarimiz

o'rtasidagi do'stlik va har tomonlama strategik sheriklik munosabatlarini mustahkamlashga alohida e'tibor qaratayotgani uchun samimiy minnatdorlik bildirdi.

Yetakchilar keyingi yillarda ikki tomonlama hamkorlikning barcha yo'nalishlarida ulkan yutuqlarga erishilganini ta'kidladilar.

O'zbekiston Prezidentining joriy yil yanvar oyida Xitoyga davlat tashrifi chog'ida erishilgan kelishuvlar izchil amalga oshirilayotgani alohida mamnuniyat bilan qayd etildi.

Hukumatlar, parlamentlar, tashqi siyosat va tarmoq idoralari o'rtasidagi aloqalar sezilarli darajada faollashdi.

Yil yakuniga qadar Tashqi ishlar vazirlari strategik muloqotining ikkinchi yig'ilishini Toshkent shahrida o'tkazish rejalashtirilgan. Yaqin kunlarda Xitoy parlamentining yuqori darajadagi delegatsiyasining O'zbekistonga tashrifi kutilmoqda.

Savdo-iqtisodiy va investitsiyaviy hamkorlik jadal rivojlanmoqda.

O'tgan yili tovar ayirboshlash hajmi 14 milliard dollarga yetdi. Yaqin istiqbolda

bu ko'rsatkichni 20 milliard dollarga yetkazish imkoniyatlari qayd etildi.

Investitsiya loyihalarining joriy portfeli 50 milliard dollardan oshgan. Shu yil boshidan buyon mamlakatimizda 3 milliard dollardan ziyod Xitoy sarmoyasi o'zlashtirilib, 500 dan ortiq yangi qo'shma korxonalar tashkil etildi.

Infratuzilma, sanoat kooperatsiyasi, qishloq xo'jaligi va "yashil" energetika sohaslarida strategik hamkorlik dasturlarini qabul qilishni jadallashtirishga kelishib olindi.

Yaqinda Jizzax viloyatida O'zbekiston – Xitoy texnoparki ishga tushirilgani va mintaqamizda birinchi bo'lib "BYD" elektromobillari ishlab chiqarila boshlangani mamnuniyat bilan qayd etildi.

Xitoyning yetakchi moliyaviy tuzilmalari bilan hamkorlik kengaymoqda. Xususan, "lpak yo'li" jamg'armasi bilan investitsiya platformasi yaratildi, Xitoy Eksimbanki ko'magida poytaxtimizda Olimpiya shaharchasi qurilishi yakunlanmoqda. Ushbu bankning Toshkent shahrida hududiy filiali ochilishi kutilmoqda.

Hududlararo almashinuvlar faollashgani yuqori baholandi. Yil boshidan buyon mamlakatimizning barcha hududlari rahbarlari bir necha bor Xitoyga tashrif buyurdi, Shinjon-Uyg'ur avtonom rayoni, Anxoy, Szyansu, Szyansu, Chjeszyan, Shandun, Shensi va Shanxay muzofotlari delegatsiyalari O'zbekistonda bo'ldi. Pekin, Urumchi va boshqa bir qator shaharlarda savdo uylari ochildi.

Kelgusi yilda ikkinchi Hududlar forumi o'tkazilishi belgilab olindi.

Prezidentimiz XRR Raisini kambag'allikka qarshi kurashish sohasida amaliy hamkorlikni qo'llab-quvvatlayotganini alohida ta'kidladi. Bu muhim yo'nalishda tajriba almashish bo'yicha uzoq muddatli dastur qabul

qilish taklifi bildirildi.

"Bir maqol, bir yo'l" tashabbusi doirasida transport bog'liqligini mustahkamlash va mintaqani rivojlantirishda strategik ahamiyatga ega bo'lgan Xitoy – Qirg'iziston – O'zbekiston temir yo'lini qurish bo'yicha amaliy ishlarni tez fursatda boshlash muhimligi ta'kidlandi.

Mintaqaviy va xalqaro ahamiyatga molik dolzarb masalalar yuzasidan ham fikr almashildi. O'zbekiston tomonining "yagona Xitoy" siyosatini qo'llab-quvvatlash va "uch yovuz kuch"ga qarshi kurashish borasidagi pozitsiyasi o'zgarmas ekanini tasdiqlandi.

Birlashgan Millatlar Tashkiloti, Shanxay hamkorlik tashkiloti, "Markaziy Osiyo – Xitoy" formati va boshqa xalqaro hamda mintaqaviy tuzilmalar doirasidagi yaqin hamkorlik davom ettiriladi.

Davlatimiz rahbari XRR yetakchisiga ShHTga raislik davrida katta muvaffaqiyatlar tiladi.

Turizm, ilm-fan, ta'lim, kadrlar tayyorlash va xitoy tilini o'rganish sohaslarida hamkorlikni kengaytirish zarurligi ta'kidlandi.

Yaqinda Toshkentda Markaziy Osiyodagi Konfutsiy institutlari forumi bo'lib o'tadi. Mamlakatimizda XRR oliy o'quv yurtlari filiallarini ochish, Xitoyning professional ta'lim tizimi – "Lu Ban ustaxonasi"ni keng joriy etish rejalari belgilandi. Ikkinchi Ta'lim forumini kelgusi yilda o'tkazish taklifi bildirildi.

Muzokaralar yakunida O'zbekiston Prezidenti XRR Raisini mamlakatimizga tashrif bilan kelishga taklif etdi.

Uchrashuv har doimgidek o'zaro ishonch, ochiqlik va do'stlik ruhida o'tdi.

Shundan so'ng Prezident Shavkat Mirziyoyev Pokiston Islom Respublikasi Bosh vaziri Shahboz Sharif bilan uchrashuv o'tkazdi.

O'zbekiston bilan Pokiston o'rtasidagi strategik sheriklik munosabatlarini, eng

avvalo, savdo-iqtisodiyot, investitsiya va transport-kommunikatsiya sohaslarini yanada rivojlantirishning dolzarb masalalari muhokama qilindi.

Turli darajalardagi muloqotlar faol davom etayotgani mamnuniyat bilan qayd etildi. O'zaro savdo va yuk tashish hajmi, qo'shma korxonalar soni ortmoqda.

Davlatimiz rahbari Imtiyozli savdo to'g'risidagi bitim doirasida tovar ayirboshlash hajmini oshirish uchun qulay sharoitlarni shakllantirish borasidagi ishlarni davom ettirish muhimligini ta'kidladi.

Qishloq xo'jaligi, to'qimachilik, farmatsevtika, kimyo va boshqa tarmoqlarda loyihalarni amalga oshirishni nazarda tutuvchi 2025-2026-yillarga mo'ljallangan Sanoat kooperatsiyasi dasturini qabul qilish muhim ekanini qayd etildi.

Joriy yilda Hukumatlararo komissiyaning navbatdagi yig'ilishi, biznes forumi va sanoat ko'rgazmasini o'tkazishga kelishib olindi.

Transafg'on temir yo'lini qurish loyihasi amalga oshirishda birgalikdagi sa'y-harakatlar zarurligi ta'kidlandi.

Mintaqaviy kun tartibidagi masalalar yuzasidan ham fikr almashildi.

ShHTning 4-iyul kuni bo'lib o'tadigan sammiti kun tartibidan tashkilot doirasidagi ko'p qirrali hamkorlikni yanada rivojlantirish va faoliyatini takomillashtirishning dolzarb masalalari o'rin olgan. Xalqaro va mintaqaviy hamkorlikning muhim jihatlari ham ko'rib chiqildi.

Yig'ilish yakunida Ostona deklaratsiyasi hamda iqtisodiyot, xavfsizlik, ekologiya, energetika, turizm va boshqa ko'plab yo'nalishlarda sheriklikni kengaytirish bo'yicha hujjatlar qabul qilinishi rejalashtirilgan.

O'ZA.

O'zbekiston Respublikasi Prezidenti Matbuot xizmati surati.

### O'zbekiston Respublikasining QONUNI

### O'zbekiston Respublikasining ayrim qonun hujjatlariga o'zgartirish va qo'shimchalar kiritish to'g'risida

Qonunchilik palatasi tomonidan 2024-yil 23-aprelda qabul qilingan Senat tomonidan 2024-yil 18-mayda ma'qullangan

Ushbu Qonun bilan "Litsenziyalash, ruxsat berish va xabardor qilish tartib-taomillari to'g'risida"gi O'zbekiston Respublikasi Qonuniga o'zgartirish va qo'shimchalar kiritilib, ularga binoan "Umra" tadbirlarini tashkil etish va o'tkazish bo'yicha xizmatlar ko'rsatishga doir faoliyat litsenziyalanadigan faoliyatning alohida turi sifatida belgilanmoqda hamda O'zbekiston Respublikasi Din ishlari bo'yicha qo'mitasi mazkur sohadagi litsenziyalovchi vakolatli organ sifatida belgilanmoqda.

Bundan tashqari "Davlat boji to'g'risida"gi O'zbekiston Respublikasi Qonuniga "Umra" tadbirlarini tashkil etish va o'tkazish bo'yicha faoliyatga litsenziya berganlik uchun to'lanadigan davlat boji stavkasi miqdorini belgilovchi qo'shimcha kiritilmoqda.

Ushbu Qonun "Umra" ziyoratini amalga oshiradigan fuqarolarga yanada qulay shart-sharoitlar yaratishga, ularning huquqlari va qonuniy manfaatlarini ta'minlashga hamda bunday faoliyat bilan shug'ullanuvchi yuridik shaxslarning mas'uliyatini oshirishga xizmat qiladi.

(Davomi 2-betda).

### Senat Kengashida

### ONALIK VA BOLALIK MUHOFAZASIDA QANDAY KAMCHILIKLAR BOR?

Oliy Majlis Senati Kengashi majlisida reproduktiv salomatlik, onalik va bolalikni muhofaza qilish bo'yicha amalga oshirilayotgan ishlar holati muhokama markazida bo'ldi.

Senatorlar, tegishli vazirlik va idoralar vakillari ishtirok etgan tadbirni Oliy Majlis Senat Raisi Tanzila Norboyeva olib bordi.

Senat ishchi guruhi tomonidan reproduktiv salomatlik, onalik va bolalikni muhofaza qilish bo'yicha hududlarda amalga oshirilayotgan ishlar holatini o'rganish natijalari tanqidiy ko'rib chiqildi. Ta'kidlanganidek, bugungi kunda mamlakat bo'yicha onalik va bolalikni muhofaza

qilish yo'nalishida 22,3 mingta o'ringa ega 230 ta tug'uruq muassasasi hamda 13,3 mingta o'ringa ega 245 ta pediatriya muassasasi samarali xizmat ko'rsatib kelmoqda. Joylardagi birlamchi tibbiy-sanitariya yordami muassasalarida reja asosida shu yilning 5 oyi

davomida 9,2 milliondan ziyod tug'ish yoshidagi ayollarning 4,3 million nafari tibbiy ko'rikdan o'tkazildi. Ularning 1,4 million nafari ekstragenital kasalliklar aniqlangan va 877,5 ming nafari ambulator, 102,2 ming nafari stasionar sharoitda sog'lomlashtirildi.



### Oliy Majlis Qonunchilik palatasida

### Nazorat-tahlil faoliyati deputatlar muhokamasida

Oliy Majlis Qonunchilik palatasining kuni kecha bo'lib o'tgan navbatdagi majlisida mamlakat ijtimoiy-siyosiy hayotiga doir bir qator qonun loyihalari hamda parlamentning nazorat-tahlil faoliyatiga oid dolzarb masalalar ko'rib chiqildi.

#### Farzandlarimiz kamolotiga e'tibor – ustuvor vazifa

Majlisda deputatlar Maktabgacha va maktab ta'limi vazirining birinchi o'rinbosari – Maktabgacha ta'lim agentligi direktori A. Shinning "Maktabgacha ta'lim sohasida davlat-xususiy sheriklikni qo'llab-quvvatlash maqsadida maktabgacha ta'lim tashkilotlarini malakali pedagog kadrlar bilan ta'minlash, zamonaviy ta'lim dasturlari va texnologiyalarni tatbiq etish bo'yicha amalga oshirilayotgan chora-tadbirlar to'g'risida" Qonunchilik

palatasining parlament so'roviga javobini ko'rib chiqdi.

Bugungi kunda mamlakatimizda faoliyat yuritayotgan jami 33 942 ta bog'chaning 27 162 tasi nodavlat ta'lim tashkiloti hisoblanadi.

Parlament so'roviga berilgan javobda hozirda Davlat budjetidan nodavlat maktabgacha ta'lim tashkilotlariga ish haqi xarajatlari qoplash uchun subsidiyalar qonunchilikda belgilangan tartibda ajratilib kelinayotgani ma'lum qilindi.



## O'zbekiston inson huquqlari bo'yicha o'z majburiyatlarini samarali bajarmoqda

O'zbekiston tashqi siyosatida milliy manfaatlardan kelib chiqib, nafaqat xorijiy davlatlar, balki yirik xalqaro tashkilotlar bilan ham o'zaro hamkorlikni yanada rivojlantirishga ustuvor ahamiyat qaratilmoqda.

### Aks sado

Keyingi yillarda O'zbekiston va Birlashgan Millatlar Tashkiloti o'rtasidagi aloqalar tobora kuchayib borayotgani mamlakatimizning xalqaro maydondagi nufuzini oshirish va uning barqaror rivojlanish maqsadlariga erishishdagi intilishlarini namoyon qilmoqda.

Mamlakatimiz Prezidentining taklifiga binoan BMT Bosh kotibi Antoniu Guterishning yurtimizga bu galgi tashrifi O'zbekistonga jahon hamjamiyatida yuksak ishonch va e'tirof mavjudligidan darak beradi. BMT Bosh kotibi davlatimiz rahbari

bilan uchrashuvda mamlakatimizga ilk bor 20 yil avval, ikkinchi marta esa Prezidentlik faoliyatiga endi kirishgan payt kelganligini ta'kidlab, Yurtboshimiz boshchiligidagi qilingan ishlardan hayratda ekanligini bildirdi. O'zbekiston o'z fuqarolarining huquqlarini himoya qilish va ularning manfaatlarini ta'minlash kabi qat'iy rivojlanish yo'lidani sobiqqadamlik bilan borayotganini alohida ta'kidladi. Shu o'rinda inson huquqlari sohasida, xususan, qiynoq holatlarini bartaraf etish bo'yicha amalga

oshirilgan muhim islohotlarga to'xtalib o'tish joiz.

Bilamizki, ko'plab xalqaro tashkilotlar tomonidan Qoraqalpog'iston Respublikasi hududida joylashgan hamda qiynoq holatlari eng ko'p kuzatilgan "Jasliq" uzoq yillardan buyon Markaziy Osiyoning eng mudhish qamoqxonasi sifatida tilga olinib kelingandi. U uzoq yillar O'zbekistonning xalqaro obro'siga putur yetkazgan. BMTning Qiynoqlarga qarshi qo'mitasi O'zbekistonga 2002-yildan

buyon "Jasliq" qamoqxonasini yopishni tavsiya etib keldi. Nihoyat, Prezidentimizning 2019-yil 2-avgustdagi qarori bilan Qoraqalpog'iston Respublikasining Jasliq qo'rg'onida joylashgan 19-son ixtisoslashtirilgan jazoni ijro etish koloniyasi tugatildi. O'sha paytdanoq xalqaro hamjamiyat mamlakatimiz yetakchisining mazkur qarorini O'zbekistonda inson huquqlarini ta'minlashdagi ijobiy yangilik sifatida baholadi.







